

որ ի ներսն էին ի պալատն արքունի առ երես արքային՝ զնոսա ոչնչացոյց թագաւորն խրատիւ մուֆտուն, զոմանս ըսպանեաց եւ զոմանս աքսորել ետ ի Մսրը, որք էին նախարարք եւ գանձապահք արքային եւ սեղանակիցք յամենայն տեղիս առ նա կային: Եւ որք աքսորեցանն էին՝ խազնատար պաշի Ալի աղա, հիւնքեար հօճասի Ռէյհան աղա, եւ (Կարա), որք էին Մուրատին պարիսպ եւ օգնական ի սկզբանէ, վասն այսորիկ զայսոսիկ ոչնչացուցեալ՝ եթէ զթէս նորա կործանեսցեն. բայց չարհանձարն Մուրատ պրծաւ կրկին ի բանէս յայսմանէ:

Եչիս (2 Յֆր.) եւ Ուրբաթիս (3 Յֆր.) մուշավէրէ եւ խորհուրդ առնէին ի պալատ թագաւորին. եւ զայս լըւաք՝ թէ մարդ ուղարկեալ են առ Հասան աղան եւ Իփշիրի տղին, զի զօրսն իւրեանց զոր ունին եւ բազում աւերութեան առիթ լինին եւ գործող՝ ցրուեսցեն այժմ եւ խաղաղութեամբ նստցին, թէ ոչ առնիցէք զհրամանս իմ այնուհետեւ մեղք ձեր ի գլուխս ձեր:

Կիրակի օրս ամսոյ Ե-իս բարեկենդան Աստուածածնի. Մուղտեսի Մարկոսն մեր եկեղեցին ժողով աւարար: Եւ գնացաք յետ ժամուս առ Վարդապետն մեր, եւ անտի ելեալ գնացաք ի գերեզմաներն ի վերայ գերեզմանի հօրն Սուքիասի եղբօր մերոյ՝ աւրհնել զնա եւ ի վերայ քար ձգել, զի աստ եկն բանի ինչ եւ աստ մեռաւ: Եւ գնացաք երեկոյիս դառնալով ընդ որ եկեալն էաք եւ զհացն անդ կերաք եւ ելեալ եկաք ի տեղի մեր: Եւ առաւօտուս Կիրակէի Բ մարդ էին սպանեալ. չգիտացաք ո՛յք էին, զի գլուխսն ոչ գոյր ընդ նոսա, մինն՝ ի Ախսարայն եւ մինն՝ մօտ առ Տարաբխանն:

Եչիս (9 Յֆր.) Մուրատ փաշան փոխեցին եւ ետ զմօհրն վէզիրութեան Սուլէյման փաշային Մալաթիացոյ՝ որդի հայոյ: